



Blitspos betree sy 15de jaar

Om *Blitspos* te ontvang, stuur 'n e-pos na bladuitleg@nhk.co.za of grafies@nhk.co.za en versoek dat u naam op die versendingslys geplaas word

Nuus, berigte en kort kommentaar (uiters 100 woorde) aan produksie@nhk.co.za

Webblad van die Hervormde Kerk www.nhka.org

Die redaksie aanvaar verantwoordelikheid vir die inhoud. Menings deur skrywers uitgespreek, is egter nie noodwendig die beleid of standpunt van die Hervormde Kerk nie.

Daardie dag, 14 jaar gelede, toe die e-Hervormer wat later *Blitspos* geword het, gebore is, was ek ook daar. Ons het daardie dag, soos ds Marthinus van Staden 'n jaar gelede in *Blitspos* geskryf het, geleer om 'n tweede taal te praat. Tradisioneel is die publikasies van die Kerk in harde kopie uitgegee – 'n boek of 'n koerant wat jy in jou hande kon hou.

Maar daardie dag het ons finaal beseef dat tye verander en dat ons, as ons ons lidmate ingelig wil hou en nuus en inligting vinnig by hulle wil uitkry, die elektroniese pad moet gaan. En so het die weeklikse elektroniese nuusbrieffe die lig gesien.

Aanvanklik was die nuusbrieffe die verantwoordelikheid van een van die subredakteurs van *Die Hervormer*. Gou het ons egter beseef dat ons produksiebestuurder, Tessa Oppermann, by 90% van al die destydse SENTIK se werk betrokke is. So het dit gebeur dat sy nou vir die volle samestelling van die inhoud verantwoordelik is, wat dan deur Hugo van Niekerk grafies uitgelê word.

Dat *Blitspos* gewild is, kan niemand betwis nie. Elke week word die nuusbrieffe by 3 488 e-posadresse afgelewer. Ons is eerlik genoeg om te erken dat nie almal die e-pos oopmaak nie, maar ons weet van baie gemeentes wat *Blitspos* elke week na almal met e-posadresse in hul gemeente aanstuur.

Met verloop van tyd is baie gedebatteer oor die uitleg van die nuusbrieffe. Wat moet eerste en wat moet laaste kom? Die huidige uitleg is na verskeie probeerslaes vasgestel. Die weeklikse voorbladartikels, ongeveer 550 woorde lank en met die opdrag aan skrywers om in verstaanbare taal te skryf, is baie gewild.

Die nuus oor predikante en gemeentes word ook deur baie mense gelees. Gereeld kry ek 'n oproep of 'n e-pos of WhatsApp wat vra of ons nie dalk van hierdie of daardie persoon se vreugde of hartseer gehoor het nie, of dalk van hulle vergeet het.

'n Bekommernis wat in die beginjare dikwels uitgespreek is, was of ons berigte oor basaars en konserte en wen-'n-bees-kompetisies en allerhande ander fondsinsamelings moet plaas. Sou dit nie die Kerk na 'n geldvra-kerk laat lyk nie? Ons het egter gou beseef dat dit net so 'n belangrike deel van hierdie weeklikse woord van die Kerk se kant is en dat lesers goed daarop reageer.

Ons staan nie by *Die Hervormer* soos die spreekwoordelike volstruis met ons kop in die sand en dink dat daar nie 'n dag gaan kom dat al ons publikasies dalk elektronies uitgegee gaan word nie. Tans beseef ons egter dat nie almal toegang het tot hierdie elektroniese nuusbrieffe van ons Kerk nie – party weens gebrek aan data, en ander wat steeds die tradisionele koerant in hul hande verkies. Daarom sal ons so lank ons kan die status quo probeer handhaaf deur *Die Hervormer* ook in harde kopie en *Blitspos* elektronies te versprei.

Mag *Blitspos* steeds groei en vir ons weekliks, op elkeen se toestel waar ook al, die nuutste, mees aktuele nuus aflewer. Mag die volgende geslag hierdie baba van ons selfs nog groter hoogtes laat bereik.

Ons innige dank aan ons kollegas wat die droom gehad het, en aan almal wat nou reeds vir die 15de jaar die droom lewendig hou.

Ds Willem Sauer
Redakteur: *Die Hervormer* en *Blitspos*

Lief en leed



Prof Natie van Wyk



Prof Sonja Schoeman



Ds Chantelle Maree

- **Prof IWC (Natie) van Wyk** (emeritus) ondergaan verdere toetse na die operasie waaroor ons verlede week berig het. Die tumor is ontleed en daar is vasgestel dat dit 'n sekondêre kanker is wat ontwikkel het van 'n melanoom (velkanker). Ons bid hom en sy vrou, Neltjie, sterkte toe, en vertrou dat hy spoedige beterskap sal ervaar.
- **Prof Sonja Schoeman**, vrou van ds Chris Schoeman (emeritus, vroeër van Gemeente Boksburg), het op 31 Desember 2021 afgetree as emeritusprofessor in die Departement Kurrikulum- en Onderrigstudies aan die Universiteit van Suid-Afrika. Sy was 31 jaar lank (1990 tot 2021) verbonde aan die Fakulteit Opvoedkunde. Ten spyte van haar emeritaat, het sy 'n heraanstelling as navorsingsgenoot gekry. Sy is tans besig met die skryf van navorsingsverslae en die voorbereiding vir 'n internasionale konferensievoordrag in September vanjaar.
- **Ds C (Chantelle) du Toit-Phillipson** van Meyerton-Suid is op 8 Januarie 2022 deur ds Errol Sheppard in die huwelik bevestig met Cobus Maree. Sy is nou **ds Maree**. Baie geluk!
- **Die volgende predikante verjaar tot 11 Februarie, en word hartlik geluk gewens:**
 - Donderdag 3 Februarie: Ds MH (Tinus) Mc Donald (62) (siekte-emeritaat)
 - Vrydag 4 Februarie: Ds C (Chantelle) Maree (31) (Meyerton-Suid)
 - Saterdag 5 Februarie: Ds L (Lisa-Mari) Prinsloo (37) (Centurion-Oos)
 - Sondag 6 Februarie: Dr AMT (Andorette) Hill-Jowett (54) (siekte-emeritaat) en ds JA (Johan) Holtzhausen (56) (Vryburg)
 - Dinsdag 8 Februarie: Ds AJH (Jakkals) Janse van Rensburg (65) (Paarl)
 - Woensdag 9 Februarie: Di D (Dolf) Bester (33) (Boksburg), IF (Erika) Ferreira (31) (buiteland), LH (Lydia) Miller (50) (Villiers), F (Freddie) Nortje (59) (emeritus/Bergsig) en F (Ferdie) Nortje (59) (siekte-emeritaat)
 - Donderdag 10 Februarie: Di D (Dalene) Lourens (50) (Selcourt/Springs-Noord) en IJ (Jaco) Vogel (43) (Rooihuiskraal)
 - Vrydag 11 Februarie: Ds MS (Marius) Jansen van Vuren (65) (emeritus)

Gemeentes en bediening

- **VAKATURE VIR 'N ADMINISTRATIEWE BEAMPTE: Gemeente Swartkop.** 'n Vakature bestaan by Gemeente Swartkop in Centurion vir 'n voltydse Administratiewe Beampte om **diens te aanvaar op 1 Maart 2022.**

Posbeskrywing: Hantering van die gemeente se administrasie; werk van skriba vir registrasie; kolporteurswerk; neem van notule by sekere vergaderings; bemanning van die gemeentekantoor; soms toesig oor gemeentelike arbeiders.

Vereistes: Nie ouer as 60 jaar nie; kennis van kerklike administrasie; rekenaarvaardigheid (verplichtend); kennis van MS Office-produkte (verplichtend); goeie vaardigheid in die gebruik van multi- en sosiale media; kliëntgerigte persoonlikheid; vermoë om met meer as een opdraggewer te kan werk; moet op eie kan werk; bereid om toerustingskursusse in Win- en Finkerk by te woon.

Vergoeding: Maandelikse vergoeding is onderhandelbaar gebaseer op ondervinding. 'n Diskresionêre bonus kan jaarliks betaal word, soos en wanneer dit deur die Finansiële Kommissie goedgekeur word. Reiskoste word maandeliks vergoed per eisvorm van ritte onderneem. Verlof en siekteverlof.

Werkure: 08:00 tot 13:00 (Maandae tot Vrydae); tydens sommige vergaderings (kerkraad, ouderlinge, diakens, ensovoorts); beman kantoor na oggend-eredienste om lidmate se navrae te hanteer en gelde te ontvang.

Sluitingsdatum vir aansoek: 15 Februarie 2022.

Rig u aansoek (met volledige CV waarin vorige ondervinding en kerkverband aangedui moet word) **skriftelik** aan die Skriba by nhswartkop@telkomsa.net of kantoor@nhswartkop.org.

Onderhoude sal in Februarie 2022 gevoer word en die kerkraad behou die reg voor om nie 'n aanstelling te maak nie.

• **VAKATURE VIR 'N REKENMEESTER: Sinodale Dienssentrum, Pretoria.**

Vereistes: Minstens 5 jaar werkservaring; verdere kwalifikasie/opleiding sal 'n aanbeveling wees, asook kennis van Accpac en/of Pastel; rekenaarvaardigheid in minstens Microsoft Office; ten volle tweetalig; geldige rybewys; bewese bestuursvaardighede; kennis van die Nasionale Kredietwet en die Wet op Inligting; moet finansiële state kan opstel en interpreteer en dit kan voorhou by die Raad van Finansies.

Verdere vereistes: Pligsgetrouheid; vermoë om as lid van 'n span te funksioneer; goeie kommunikasie- en organisasievaardighede; meelewende lidmaat van die NHKA.

Vergoeding: Onderhandelbare salaris met normale diensvoorwaardes.

Sluitingsdatum: 28 Februarie 2022.

Navrae en aansoek: Aansoek met CV moet gerig word aan mev Susan Moore, Posbus 2368, Pretoria 0001; e-pos mannekrag@nhk.co.za; tel 012 322 8885; faks 012 322 7909.

- Na twee jaar waarin gemeentesang en kerkmusiek bitter min aandag in die lewe van gemeentes en gelowiges ontvang het, is dit nou weer **tyd om te sing**. Dis ook tyd om weer **nuwe musiek** aan te leer sodat ons ook in nuwe omstandighede op nuwe maniere ons stem tot God kan laat klink. **Gemeente Pretoria-Oos** nooi u uit na die bekendstellingsgeleentheid op **26 Februarie 2022**. Tydens dié geleentheid sal u blootgestel word aan **40 nuwe VONKK-liedere** wat spesifiek handel oor die geboorte, lewe, sterwe en opstanding van Jesus Christus. Dit sal u help om in 2022 die heilsgebeure van God in Jesus Christus op 'n nuwe manier in die mond van die gemeente te plaas. U gaan luister na soliste en 'n kantory, maar veral saamsing met wonderlike begeleiding! Hierdie geleentheid is bedoel vir alle predikante, orreliste, eredienswerkgroepe en enige persoon wat in kerkmusiek en gemeentesang belangstel. Predikante sal ook vir die geleentheid vyf VBO-punte kan verdien. Kontak Pieter van den Berg by orrelpieter@yahoo.com en **registreer voor 20 Februarie 2022**.

ONS NOOI JOU UIT NA
EEN LEWE!

'n Bekendstelling van 40 nuwe liedere
oor die lewe, sterwe en opstanding van Jesus Christus

Saterdag 26 Februarie 2022 van 09:00 tot 13:00
Hervormde Kerk Pretoria-Oos

R150

Bespreek jou plek: orrelpieter@yahoo.com

Vergaderings

- Vrydag 4 Februarie: Oudit- en Risikokomitee
- Maandag 7 Februarie: Plesion Direksie
- Vrydag 11 Februarie: Moderamen

Kerklike publikasies

- **Mev Mari-lizé Beukes**, Voorsitter: NHSV Hoofbestuur, skryf soos volg: “Die NHSV Hoofbestuur, wat bestaan uit die ses Dagbestuurslede plus die 17 NHSV streekvoorsitters van die 17 streke in Suid-Afrika, is ’n paar jaar gelede genader om artikels te skryf vir die afdeling **Vrouebediening** op ons Hervormde Kerk se webblad. Volg die skakel vir die eerste artikel vir 2022 (*Geluk is tuisgemaak!*) onder die afdeling Vrouebediening op die **Kerk se webblad** <https://nhka.org/geluk-is-tuisgemaak/> ”



- In die **2022 Somer-uitgawe van Vroueflitse** begin die NHSV die jaar met twee opbouwende artikels oor geestesgesondheid en ouerskapbetrokkenheid. *Kleur jou jaar in met liefde, omgee en lag!* Met Valentynsdag om die draai, gee ons graag geskenke vir ons geliefdes en vriende, maar watter Valentynsdaggeskenk gee jy vir jouself? **Mev Mari-lizé Beukes** volg dit op met nog ’n artikel, *Toksiese ouerskapfoute*, wat wys op die gevaartekens van verkeerde leiding deur ouers en die impak daarvan op jong kinders, en hoe dit hulle beïnvloed in hul volwasse lewe en by die werk.

Hou jou gedagtes positief, want dit word jou woorde.

Hou jou woorde positief, want dit word jou gedrag.

Hou jou gedrag positief, want dit word jou gewoontes.

Hou jou gewoontes positief, want dit word jou waardes.

Hou jou waardes positief, want dit bepaal jou bestemming.

Volg die skakel <https://nhsv.org.za/publikasies/>



Studentesake

- **Studentebehuising vir 2022.** **Gemeente Philadelphia** verskaf aan studente veilige behuising by Fleur de Lis op die kerkterrein. Dit bestaan uit enkelkamers met gedeelde fasiliteite. Die behuising is binne stapafstand van die kampus en winkelsentrums. Skakel dr Sanrie de Beer by 083 226 1866 of stuur ’n e-pos na nhkphiladelphia@gmail.com vir meer inligting.

Tuinwoonstel in Villieria te huur

Netjiese, ruim enkel-tuinwoonstel
Beskikbaar 23 Maart 2022

R3 300 per maand plus kragverbruik
Deposito betaalbaar
Geen gesinne en troeteldiere

Skakel 082 925 7195



- **Gemeente Potchefstroom-Studente** wil graag kontak maak met al die eerstejaars wat in 2022 in Potchefstroom kom studeer en meer inligting aan hulle deurgee. Ons wil kontak hou deur WhatsApp-boodskappe, ensovoorts. Voltooi asseblief die inligtingsvorm by <https://forms.gle/qZZrekn4VbZ6GFzH6>.
- **Gemeente Potchefstroom-Studente: Eerstejaarskamp**
Datum: 7-10 Februarie
 Plek: Venterskroon
 Koste: R1 000 per persoon
 Navrae: Dr Rudy Denton 082 459 9710
 Inligtingsvorm: <https://forms.gle/qZZrekn4VbZ6GFzH6>
- **Studentebehuising vir 2022. Gemeente Stellenbosch** kan veilige behuising op die kerkterrein en op die kampus aan studente verskaf. Dit bestaan uit óf enkelkamers met gedeelde fasiliteite, óf eenmenswoonstelle. Skakel dr Chris le Roux by 079 495 3239 of stuur 'n e-pos na stellenbosch@nhk.co.za vir meer inligting.
- **Gemeente Stellenbosch** versoek alle voornemende studente aan die Universiteit van Stellenbosch om jul inligting aan die gemeente te verskaf. Ons sal graag daarvan wil kennis neem. Kontak dr Chris le Roux by 079 495 3239, of stellenbosch@nhk.co.za.

'n Gedig

Skyn

Lapblomme is nie mooi nie;
 jy weet, die oomblik as jy aan hul raak,
 jy is mislei: hulle is vals, oneg, namaak.

Die skoonheid van 'n blom
 lê nie net in sy vorm en sy kleur nie,
 maar in wat bye en vlinders na hom lok;
 dit wat hy diep binne in hom
 onsigbaar by die eerste aanblik hou.

Al word hy in die natuur
 duisendvoudig herhaal,
 hy bewaar in sy kelk
 sy delikate geur en kwesbare stuifmeeldrade
 en in elke blaartjie sy tekstuur.

'n Blom bedwelm, omdat hy verwelk;
 omdat sy skoonheid net vir één bloeityd duur.

Lina Spies

(Uit: *Tydlose gety*, 2010)

Fondsinsamelings

- **Gemeente Eendracht: Skaapkop-oggend**
Saterdag 5 Maart 2022
 Kerksaal om 10:00
 R150 per kop, R120 skaappotjie, R50 per kind (pizza)
 Kaartjies by ds Markus Pretorius 082 395 1754
 Mev Belinda Jordaan 076 626 7571
- **Rata Maatskaplike Dienste** is gebore uit die NHKA en werk deur die jare onverpoosd voort om kinders uit haglike omstandighede te red en aan hulle die nodige beskerming en

statutêre dienste te bied, asook om die moeisame pad na heelwording saam met hulle te stap. Die koste daarvan beloop ongeveer R10 000 per jaar per kind. Oor die tydperk van 2020-'21 is meer as 1 600 kinders uit omstandighede van mishandeling, verwaarlosing en selfs situasies van kinderhandel verwyder.

Ten einde broodnodige fondse aan te vul, hou Rata se hoofkantoor 'n jaarlikse gholfdag, hierdie jaar op **23 Augustus by Silver Lakes Country Club – ons 8ste Gholfdag**. Ons vra vir ondersteuning in die vorm van vierbalinskrywings, borgskappe en pryse. Enige hulp word opreg waardeer. Begroot solank nou, kry jul spanne bymekaar en gaan loer na die wit olifante wat as pryse kan dien. Dink ook asseblief aan kennisse en kontakte wat mag belangstel om hande te neem met ons en kinderbeskerming te ondersteun.

Inskrywingsvorme, borgskapvorme en meer inligting kan aangevra word van Annelie by info@rata.org.za of 064 437 5997.

Barmhartigheid

- **9de Algemene Diakensvergadering**

- **Verskillende webinare via Zoom**

- Dinsdag 5 April: Inleiding tot armoedegesprek
- Donderdag 7 April: Trauma van armoede
- Dinsdag 12 April: Nuwe antwoorde in veranderende omgewings
- Dinsdag 19 April: Sosiale entrepreneurskap en armoede
- Donderdag 21 April: Netwerke
- Vrydag 22 April: Opening en konstituering
- Saterdag 23 April: Amptelike vergadering

- **Athalia Uitreik in Bloemfontein**

- **Verblyf vir en versorging van bejaardes en gestremdes**

- Enkel- en deekamergeriewe in 'n huislike atmosfeer

- Verblyf met 3 etes ingesluit

- Verblyf sonder versorging R1 700 per maand

- 24-uur-versorging onderhandelbaar

- (maksimum R8 000 per maand deekamer)

- Navrae: 079 826 6363 / 084 023 0315 / 051 522 6089

- navrae@athalia.co.za

- www.athalia.co.za

- **Ons Tuis Emily Hobhouse** is die ideale tuiste vir persone wat nog selfversorgend is. Tans is daar eenslaapkamereenhede te koop teen R364 348 en R377 472. Dit is in 'n gevestigde, boomryke area met 'n lieflike berguitsig. Kontak mev Hannelie Fourie by 012 325 1857 x216 of HannelieF@otmt.org.
- **Machteld Postmus-behuisingskompleks vir bejaardes** in Brooklyn, Pretoria, het 'n **tweeslaapkamer-woonregeenheid** beskikbaar by Frans Boshoff: Dit is Woonstel 3 teen R485 000. Kontak mev Hannelie Fourie by 012 325 1857 x216 vir meer inligting.
- **Louis Trichardt-behuisingskompleks vir bejaardes** in Danville, Pretoria, bied kamergeriewe met drie etes per dag teen R4 435 per maand. Vir meer inligting, kontak mev Vicky Muller by 012 386 5310.
- **Ons Tuis (Andries Marié Oosthuizen) in Parys** het tans plek beskikbaar in die tehuise vir versorging van verswakke bejaardes teen R9 760 per maand. 'n Volledige versorgingsfasiliteit sluit in 24-uur-versorging, drie maaltye per dag en sekuriteit. Behuisingsfasiliteite teen R5 990 per maand is ook beskikbaar op dieselfde perseel; dit sluit drie etes en weeklikse wasgoed en skoonmaak van kamers in asook gratis deelname aan sosiale programme. Vir meer besonderhede, skakel matrone Teresa Broodryk by 056 811 2185.

- **Seniordal-aftreeoord**
Kieserstraat 126, Rietondale
Een enkelwoning te koop teen R510 000
Een eenslaapkamerwoning te koop teen R515 000
Een 1½-slaapkamerwoning te koop teen R520 000
Een tweeslaapkamerwoning te koop teen R560 000
Een tweeslaapkamerwoning te huur teen R6 500 per maand
Navrae: Beulah du Plessis by 082 847 9544
Seniordalpta@gmail.com

Betaalde advertensies in hierdie nuusbrieff

Die koste vir advertensies is **R250 per plasing (BTW ingesluit)**. Die verskuldigde bedrag moet uitgemaak word aan die Raad van Finansies, ABSA tjekrekening nommer 020-000-287, takkode 632-005, verwysing: u naam + Blitspos. Neem kennis dat die redaksie in uitsonderlike gevalle mag besluit om 'n advertensie nie te plaas nie en die adverteerder se geld terug te betaal.

Meer besonderhede oor advertensies kan aangevra word van produksie@nhk.co.za.

Gebed vir die week

Heer Jesus,
U wat die dissipels geleer het hoe om te bid,
leer my ook hoe om te bid.
Leer my hoe om te luister en nie angstig te wees
as ek nie u stem hoor nie.
Wanneer ek lafhartig is in my gebede,
versterk dan my hart.
Wanneer die wilskrag by my ontbreek om te bid,
wees my genadig
en help my om weer te begin.
Wanneer my woorde tekortskiet,
of heeltemal ontbreek,
laat my die stem van u Gees hoor
wat in my bid.
Ek vra dit in die Naam van die Een
wat gretig op al my gebede wag,
hoe heelhartig of halfhartig hulle ook al mag wees.
Amen.

(W David O Taylor, Twitter 18/02/2020)

(Afrikaanse verwerking: Tessa Oppermann)